



श्रीहनुमानचालीसा

श्रीगुरु चरन सरोज रज,
निज मनु मुकुर सुधारि ।
बरनऊँ रघुबर बिमल जसु,
जो दायकु फल चारि ॥
बुद्धिहीन तनु जानिके,
सुमिरौँ पवन-कुमार ।
बल बुद्धि बिद्या देहु मोहिं,
हरहु कलेस बिकार ॥
जय हनुमान ज्ञान गुण सागर ।
जय कपीस तिहँ लोक उजागर ॥
राम दूत अतुलीत बल धामा ।
अंजनि-पुत्र पवन-सुत नामा ॥
महाबीर बिक्रम बजरंगी ।
कुमति निवार सुमति के संगी ॥
कंचन बरन बिराज सुबेसा ।
कानन कुंडल कुंचित केसा ॥
हाथ बज्र औ ध्वजा बिराजै ।
काँधे मूँज जनैऊ साजै ॥५॥
संकर सुवन केसरीनन्दन ।
तेज प्रताप महा जग बन्दन ॥
विद्यावान गुनी अति चातुर ।
राम काज करिबे को आतुर ॥
प्रभु चरित्र सुनिबे को रसिया ।
राम लखन सीता मन बसिया ।

सूक्ष्म रूप धरि सियहिं दिखावा ।
बिकट रूप धरी लंक जरावा ॥
भीम रूप धरी असुर सँहारे ।
रामचन्द्र के काज सँवारे ॥१०॥
लाय सजीवन लखन जियाये ।
श्री रघुबीर हरषि उर लाये ॥
रघुपति कीन्ही बहुत बड़ाई ।
तुम मम प्रिय भरतहि सम भाई
सहस्र बदन तुम्हरो जस गावैं ।
अस कहि श्रीपती कंठ लगावैं ॥
सनकादिक ब्रह्मादि मुनीसा ।
नारद सारद सहित अहीसा ॥
जम कुबेर दिगपाल जहाँ ते ।
कबि कोबिद कहि सके कहाँ ते ॥१५॥
तुम उपकार सुग्रीवहिं कीन्हा ।
राम मिलाय राज पद दीन्हा ॥
तुम्हरो मंत्र बिभीषण माना ।
लंकेस्वर भए सब जग जाना ॥
जुग सहस्र जोजन पर भानू ।
लील्यो ताहि मधुर फल जानू ॥
प्रभु मुद्रिका मेलि मुख माहीं ।
जलधि लौंघि गये अचरज नाहीं ॥
दुर्गम काज जगत के जेते ।
सुगम अनुग्रह तुम्हरे तेते ॥२०॥
राम दुआरे तुम रखवारे ।
होत न आज्ञा बिनु पैसारे ॥
सब सुख लहै तुम्हारी सरना ।
तुम रच्छक काहु को डरना ॥
आपन तेज सम्हारो आपै ।
तीनों लोक हौं क ते काँपै ॥
भूत पिसाच निकट नहीं आवै ।
महाबीर जब नाम सुनावै ॥
नासै रोग हरे सब पीरा ।
जपत निरन्तर हनुमत बीरा ॥२५॥
संकट तें हनुमान छुड़ावै ।
मन क्रम बचन ध्यान जो लावै ।
सब पर राम तपस्वी राजा ।
तिन के काज सकल तुम साजा ॥
और मनोरथ जो कोई लावै ।
तासु अमित जीवन फल पावै ॥

चारों जुग परताप तुम्हारा ।
है परसिद्ध जगत उजियारा ॥
साधु सन्त के तुम रखवारे ।
असुर निकंदन राम दुलारे ॥३०॥
अष्ट सिद्धि नौ निधी के दाता ।
अस बर दीन जानकी माता ॥
राम रसायन तुम्हरे पासा ।
सदा रहो रघुपति के दासा ॥
तुम्हरे भजन राम को पावै ।
जनम जनम के दुख बिसरावै ॥
अन्त काल रघुबर पुर जाई ।
जहाँ जनम हरि-भक्त कहाई ॥
और देवता चित्त न धरई ।
हनुमत सेई सर्व सुख करई ॥३५॥
संकट कटै मिटै सब पीरा ।
जो सुमिरै हनुमत बलबीरा ॥
जय जय जय हनुमान गोसाईं ।
कृपा करहु गुरु देव की नाई ॥
जो सत बार पाठ कर कोई ।
छूटहि बंदि महा सुख होई ॥
जो यह पढ़ै हनुमान चालीसा ।
होय सिद्धि, साखी गौरीसा ॥
तुलसीदास सदा हरि चेरा ।
कीजे नाथ हृदय में डेरा ॥४०॥
पवनतनय संकट हरन,
मंगल मूरति रूप ।
राम लखन सीता सहित,
हृदय बसहु सुर भूप ॥
सिया बर रामचन्द्र की जय ।
पवन सुत हनुमान की जय ।
उमापति महादेव की जय ।

Visit:

<https://top36news.com/>